

**Ullutsinnut naleqquttumik ingerlatsinikkullu illersorneqarsinnaasumik Inuusuttut
Inuiaqatigiinni Kiffartuussisarnerisa eqquteqqinneqarnissaanik
inassuteqaasiortussamik suleqatigiissitamik Naalakkersuisut pilersitseqqullugit
peqqueneqarnissaannik Inatsisartut aalajangiiffigisassaattut siunnersuut. Inernera
Inatsisartunut saqqummiunneqassaaq UPA2017-imi.**

Siumumit saqqummiunneqartoq

aamma

**Inatsisartunut aaliangiiffigisassatut siunnersuut Naalakkersuisut UPA 2017-imit
peqqueneqassasut inuusuttut 16-iniit 29-nik ukiullit ilanngullugit suliffissarsiortutut
allatsissimasut, ilinniagaqalernissaat suliffittaarnissallu siunertaralugu immikkut
ittumik pilersaarusiussasut**

Inuit Ataqatigiinnit saqqummiunneqartoq

pillugit

Inuussutissarsiornermut Ataatsimiititaliap

siunnersuutit aappassaaneerneqarnerannut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqatigiit, siulittaasoq
Inatsisartunut ilaasortaq Justus Hansen, Demokraatit, siulittaasup tullia
Inatsisartunut ilaasortaq Vivian Motzfeldt, Siumut
Inatsisartunut ilaasortaq Nikolaj Jeremiassen, Siumut
Inatsisartunut ilaasortaq Kelly Berthelsen, Inuit Ataqatigiit

UKA2016-imi ulloq 14. oktober 2016-imi siullermeerinninnerup kingorna ataatsimiititaliap
siunnersuutit misissorpai.

Siunnersuutit imarisaat siunertaallu

Ilaatigut Inuusuttut Inuiaqatigiinni Kiffartuussisarnerisa eqqunneqarnissaanik
inassuteqaasiortussamik suleqatigiissitamik pilersitseqqullugit, ilaatigullu inuusuttut 16-imit

29-nut ukiullit suliffeqalernissaannut ilinniagaqalernissaannulluunniit periusissiamik saqqummiusseqqullugit Naalakkersuisut peqquneqarnissaat siunnersuutini kissaatigineqarpoq.

Siunnersuutit Inatsisartuni siullermeerneqarnerat

Siunnersuutit siullermeerinninnermi oqaaseqartartunit tamanit kiisalu Naalakkersuisunit tapersorsorluarneqarput.

Ataatsimiititaliap siunnersuutininik suliarinninnera

Siullermeerinninnermi siunnersuutit nalinginnaasumik minnerunngitsumillu Naalakkersuisunit tapersorsorluarneqartut ataatsimiititaliamit maluginiarneqarpoq.

Tassunga atatillugu ataatsimiititaliamit maluginiarneqarpoq Naalakkersuisut akissuteqaamminni oqaatigigaat inuusuttuni suliffissaaleqineq annikillisarniarlugu pilersitaq qulequtalik "Inuusuttuni suliffissaaleqineq malunnartumik annikillisinneqassaaq" 2015-imi kommunit qanimut suleqatigalugit aallartisarneqartoq, inuusuttut tassaammata suliffissaaleqinermik naatsorsueqqissaarinermi amerlavallaartuusut. Inuusuttunut suliffissaaleqisunut Majoriaq ingerlatsivimmi neqeroorutaasoq 2015-imi ilassutitut inissanik suli 100-nik ilaneqarluni nukittorsarneqarpoq aammalu 2016-imi ilassutitut 150-inik inissanik ilaneqarluni. Neqeroorutaasut tassaapput atuagarsornerunngitsumik ingerlassat, suliffimmik sungiusarneq aamma ilinniartunut atuagarsornikkut sanngiissusilinnut tunngatitatur neqeroorutit.

Immikkut ittumik iliuuserisamit pilersitat arlallit Majoriaq-ingerlatsivimmi neqeroorutaasunut nuunneqarput, taamaalillutik assersuutigalugu atuagarsorluni piginnaanngorsaanermik ingerlassami innuttaasut amerlanerit piaarnerusumik ingerlataqarsinnaalerlutik, taamaalillutillu ilinniagaqarsinnaalissallutik. Tamakku saniatigut nunaqarfinni piginnaanngorsaanermik suliniut ingerlanneqarpoq: NUIKI – Nunaqarfinni Ilinniartitaanermik Kivitsineq. NUIKI tassaavoq ukiumi ataatsimi atuagarsornikkut piginnaanngorsaaq, meeqqat atuarfiannik suleqateqarluni najukkani ingerlanneqartartoq. Saaffigisat tassaapput inuusuttut 30-t inorlugit ukiullit, nunaqarfinni najugaqartuusut. Anguniagaq tassaavoq sapinngisamik inuit amerlanerpaat siunissaminnut tunngatillugu tunngaveqarluartumik toqqaanissaminnut sapinngisamik pitsaanerpaanik sakkussaqalernissaat.

Majoriaq-ingerlatsivinni suliniutit qularnaassavaat suliffeqarnermut aamma pikkorissaaq-pinnermut suliniutit ataqatigiissaarnissaat kiisalu inunnik ajornartorsiortunut iliuusissatut pilersaarutit inunnik isumaginnittoqarfinnit isumagineqarnissaat. Taamatullu inuusuttut inuiaqatigiinni kiffartuussisarnissaat Majoriaq-ingerlatsivinni suliassanut ilaatinneqareemat, ineriartortinneqarnerilu ullutsinnut naleqquttumik ingerlatsinikkullu illersorneqarsinnaasumik Inuusuttut Inuiaqatigiinni Kiffartuussisarnerisa eqquteqqinneqarnissaanik siunnersuummut

assingusuummat Naalakkersuisut suleqatigiissitamik, Namminersorlutik Oqartussat Majoriaq ingerlatsivinnut tapertaasussanik kommunini sammisassaqartitsiniarlutik ingerlatanik assigisaannillu suliaqarsinnaanerinit misissuisussamik, pilersitsiniarput.

Aalajangiiffigisassatut siunnersuutit saqqummiunneqartut taakku marluk suliniummi aallartinneqareersumi ilaatinneqareersutut oqaatigineqarsinnaanerit ataatsimiititaliamit tusaatissatut tiguneqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit saqqummiunneqartut akuersissutigineqarneranni aningaasaqarnikkut kingunerisassatut naatsorsuutigineqartut ilusiliinissamut piumasaqaatit naapertorlugit siunnersuuteqartumit nalunaarneqarsimapput. Naalakkersuisut siunnersuutit akuerineqarnissaannik inassuteqartut siullermeerinninnermut atatillugu kingunerisassatut nassuiaatigineqartut akerlilersimanngilaat. Tamanna tunngavigalugu tamatuma annertunerusumik oqaaseqarfiginissaa ataatsimiititaliamit tunngavissaqartinneqanngilaq.

Ataatsimiititaliap inassuteqaatai

UKA2016/36

Siunnersuut akuerineqassasoq ataatsimiititaliap isumaqatigiittup inassutigaa.

Aamma


UKA2016/50

Siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Mimi Karlsen,
Siulittaasoq




Justus Hansen
siulittaasup tullia



Vivian Motzfeldt



Nikolaj Jeremiassen



Kelly Berthelsen